

# LAIKIM MOA NES



Poto antap i soim 10-pela nes i kisim setifiket bilong ol long han bilong Dokta Gobius long Boram Haus Sik long Wewak, long de namba 25 bilong Jun. Kirap long lephan yu lukim: Patricia Jaroma (Yarapos), Magdalena Woworan (Turubu), Katarina Hufinong (Sassoya), Agnes Boroku (Warabung), Elisabeth Rika (Sassoya), Martha Siles (Kavieng), Rondi Bagasi (But), Gertrude Makil (Kairiru), Martha Aisak (Kaugia), Mary Anton (Westen Ailans).

Long Port Moresby 60 bikipela sista na nes i kibung inap 6-pela de na ol i autim planti wari bilong ol, long wanem Papua Nu Gini i sot tru long ol nes. Ol i laikim planti meri moa i kisim dispela wok. Ol i laikim tu ol meri bipo ol i nes na nau ol i marit pinis, bai ol i ken kam bek holim wok nes gen.

## OL I WINIM MANI:

Leo Walol, Ulupu  
 Linus Kopa, Woitape  
 Reuben Guma, Mendi  
 Mrs. Nomi Akio, Madang  
 Gabriel Hamau, Lae

(Lukim pes 20)

## Wantok niuspepa go het moa

WANTOK niuspepa i solap inap long 20 pes dispela taim. Bilong wanem? Long wanem planti kampani i laik putim toksave bilong ol insait long wanem ol i laik ol pipel bilong Papua Nu Gini stret i lukim. Ol i save sapos ol i baim WANTOK niuspepa bai ol i ken lukim na baim ol samting.

Wanpela samting yet. Ating ol Sepik i stap nabaut long Papua Nu Gini i save WANTOK i gat 8 pes moa i pulap long Sepik nius tasol. Em i bilong Sepik Distrik; tasol ol man bilong ol arapela hap i ken kisim tu. Yu askim tasol.

## TOK PISIN INSAIT LONG PAPUA PINIS

Olgeta skul bilong gavman insait long Papua i bin lukim tok pisin long WANTOK niuspepa. Ating ol i laikim tu. Long wanem nau long laik bilong ol yet tenpela skul long Papua stret i kisim moa long 100 WANTOK olgeta tupela wik.

Ol i save tok pisin pinis. Husat i tok i no gat tok pisin long Papua? Tru, a?

Wanpela man long gavman i bin askim mipela long wokim 4-pela pes nius bilong Papua tasol Yes. Long tok pisin yet Olaboi, pisin i go het.

## MANI WETIM 2,489 MAN Ating Yu?

I gat moa olsem 52 tausen dola (\$52,116) i wetim 2,489 man.

Ol mani hia i stap long Kopra Maketing Bot long Port Moresby.

Em i winmani, bot hia i no bekim yet. Ol i lukautim ol man i salim kopra.

Sapos yu save salim kopra long kopra bot, yu go askim ol sapos sampela winmani i wet long yu. Kopra bot i gat ol dispela nem.

Na kiap o het tisa tu i ken painim long "Government Gazette", namba 49,31 May 1973.

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prininem nem bilong yu tru, orait yu raitim wanpela narapela nem bilong yu.

## NO DAUNIM ARAPELA LOTU

Dia Edita.- Mi laik bekim pas bilong brata Pius Ekruai, bilong Nipa Sab Distrik.

Yes brata yu stap long hap bilong yu, na yu skulim ol manmeri long gutnius bilong Jisas Kraist.

Hap yu stap long em i gat planti kain lotu na i gat planti kain man.

Na yu skulim ol man na meri long tok bilong God long Baibel, na i gat arapela lotu o man nogut i save tok bilas long yu.

Maski yu no wari, yu save pinis, i gat sampela man i skul tru long Baibel, na ol i no skul tru na i no bilip tru long Baibel.

Ol i laik litimpaim nem bilong ol tasol olsem ol Ferisi.

Na sapos yu gat Baibel bilong yu na yu ken painim wok bilong ol Apostel. Sapta 1. i go inap long Sapta 28.-31 em bai yu ritim na kism planti tingting long ol wok bilong Apostel Paulus i raitim.

Na Baibel i no samting bilong resis, no gat. Baibel i tok yumi i mas bilip na lukluk long yumi yet tu.

Yes, brata Pius, mi tu mi painim planti olkain trabel olsem yu tok pinis. Na em i hatwok tru long stretim, ol pipel long ol kain kain lotu.

Tasol maski, yumi ken mekim hatwok long Eklesia bilong yumi i ken sanap strong. Yumi mas tingting Santu

Apostel Paulus em i no slo na pret.

Na sapos man i tok, mi man bilong bilip na mi save bihainim gut Baibel, bai ol arapela i bihainim em. Tasol em i no tingting long wokabout bilong em, na sindaun bilong em.

Planti man mi lukim ol, ol i save pret long ai bilong man i lukim ol. Ol i save sem na pret, na ol i no ting long ai bilong God.

Na Pius, mi skruim tasol tok bilong yu, sapos yu gat moa, yu rait tasol i kam long Wantok Niuspepa.

L.Wani,  
Nuku W.S.D.



## KAMPANI NO RABISIM PLAK

Dia Edita.- Nau mi laik autim wanpela wari bilong mi long plak bilong dispela kantri bilong yumi yet.

Mi lukim ol tin pis ol bisnisman i salim long ol tretstua long Erave na ol pipel bilong ples i baim.

Mi lukim antap bilong tin pis i gat piksa bi-

long plak bilong dispela kantri. Mi ting em i no stret tru. Bikos plak em i samting tru bilong kantri na i no ken wanpela i pilai nabaut long em. Plak em i no samting bilong bilasim ol samting bilong tanim pekpek olsem tin pis, na ol arapela samting olsem bilong kai-kai.

Mi ting kampani i wokim dispela tin pis i rabisim plak bilong dispela kantri bilong yumi.

Sapos ol i putim plak long balus o ka em i gutpela.

Mi wanpela longlong het na mi raitim dispela wari bilong mi long Wantok.

Gornelius Koya,  
Erave/S.H.D.

## SAVEMAN NO HARIAPIM BOI

Dia Edita.- Mi gat wari long ol saveman o pepaman ol i save wok long ol plantesin na long taun.

Ol i save hariapim ol boi tru long wok, na dispela kain pasin i no stret tru.

Sapos yu save man, na watpo yu no laik stap long ples bilong yu na statim bisnis long hap bilong yu, na ol boi i kam wok long yu. Olsem yu ken hariapim ol long wok, na bai i stret olsem yu i masta pinis.


Tasol yu saveman mitupela i kam long plantesin o taun long painim mani tasol. Na masta i baim mitupela long mani, na maski long yu i hariap tumas.

Em i no wok bisnis bilong yu. Olsem mi kanaka na mi no save long rit na rait.

Sapos yu husat saveman o pepaman yu gat

wanem kain tingting yu ken rait i kam long Wantok Niuspepa na yu ken stretim wari bilong mi.

Andrew Meiam,  
Kimbe/W.N.B.D.



## NO KEN TOK BILAS, BIKMAN

Dia Edita. Mi lukim toktok bilong Anton Parao long Wantok Nius namba 65 long Epril 4 long pas bilong wanpela brata bilong mi em George Bakin bilong Madang.

O yes, Parao tok bilong yu i gutpela tru. Yu kolim mipela manmeri long nambis i rabis na mipela i bilong kaikai buai tasol na i no gat bisnis.

Nau mi laik soim yu sampela hevi i bin kamap long yu. Wanpela i bin kamap pinis long yia 1972. Yu gat wanpela kaikai tasol long Hailans na yu sot tru long kaikai.

Taim bikpela hangre i kamap long Westen na Saten Hailans, husat i helpim ol long kaikai? Ating yu no? Mi ting yu yet no gat tru.

Planti tausen dola i kam long 14-pela distrik long nambis wantaim Koalisen Gavman na Gavman bilong Australia na planti ol

arapela kantri.

Sapos bihain wanpela hevi i kamap long nambis yu inap long mekim pasin bilong helpim tu no?

Mi ting yu i no inap long mekim dispela, bikos yu haiden na yu no save long pasin bilong givim bel.

Mi laik askim yu, yu i gat hamas kain kaikai sapos gaden kaukau bilong yu i bagarap, na yu inap kisim help long dispela kaikai na abus?

Yu inap bekim dispela bikpela help i kam long ol distrik long

nambis? Mi ting yu wanpela i no inap na yu olsem kaukau bilong yu yet.

Mi askim yu moa, ating yu memba bilong Haus na yu gat planti save long rot bilong salim kopi bilong yu long narapela kantri. Yu gat ples bilong yu long bikpela sip i kam insait long kisim kopi long taim Papua Nu Gini i kisim independens bihain.

Sapos yu laik birua long ol pipel long nambis ating yu yet yu pasim rot bilong salim kopi long bikpela sip,

na narapela yu no gat rot tu long kisim kago samting i kam long Hailans.

Mipela i no lukim wok bilong yu long Westen Hailans. Yu yet i no gat wanpela lo i stap long yu.

Tok na tingting bilong yu i no olsem wanpela lida bilong gavman.

Nisbet Morgan Kalale, Kundiawa/Chimbu.

Mi save lukim planti taim long ai bilong mi tu. Planti man i save baim kaikai bilong ol lapun man na meri.

Sampela yangpela pipel o lain man ol i go bek wantaim kaikai tu. Watpo ol i mekim olsem? Mi tokim yu wantok.

Pastaim tru ol lain man long taun i no inap long pinisim kaikai. Ol i kisim liklik long laik bilong ol.

Na tu sampela samting i doti, sampela i gutpela na sampela i no gutpela tru.

Olsem tasol ol man bilong baim i save skelim ol lain kaikai yet.

Ating Pontius i lukim taim ol yangpela i baim kaikai olsem, klin gutpela no gat bruk bruk skin, i no gat hap lip i dai o drai olgeta?

Na tu husat i gat save long ol samting olsem, i mas save hamas man bai i kaikai samting ol i baim long maket.

Sapos wanpela i no skelim na baim bai ol samting i go sting olgeta.

Long Goroka sampela lapun meri i save kam wantaim ol kaukau i liklik tru olsem stik.

Sampela i save kam wantaim ol kon i strong tru. Orait husat i laik baim ol samting olsem?

Ating ol dispela samting tasol na ol lapun man na meri i save wari long ol i no baim long ol.

Therese Mangta'ari, Goroka.



## BAIM SAMTING LONG MAKET

Dia Edita.- Mi laik bekim pas bilong Pontius Waigo bilong Okapa Dispela leta mi ritim long Wantok bilong Trinde Mas 7.

Pontius em i tok, em i wari bikos em i lukim long maket bilong Goroka na Kainantu olsem, ol yangpela manmeri i save baim ol samting long ol yangpela manmeri tasol.

Long tingting bilong mi, mi tok Pontius i no tok stret. Bikos i gat planti manmeri ol i baim samting bilong ol lapun man na meri.

I tru planti ol i save i go long ples wantaim kaikai bilong ol. Tasol bikos i no yangpela manmeri i baim samting bilong ol narapela man tasol. Nogat tru.

Pontius, mi no ting yu lukluk gut long maket bilong Goroka.



Mi No Ken Save tu, poro. husat man i Save long dispela Samting em i mas bekim askim kwiktaim!

## TU MINIT TINGTING

TU LUSIM PREA .....

"Yupela i mas holim strong pasin bilong prea."

(Kolosi 4:2.)

Long 1942 i go inap 1946 i gat bikpela pait bilong ol Japan wantaim Amerika na Australia i kamap long Papua Nu Gini. Long dispela taim planti manmeri i mekim pasin bilong prea planti tumas. Tasol taim pait i pinis ol manmeri i lusim tingting long prea na ol i wok nating tasol.

Yumi ken tok olsem. Prea em wok tru bilong ol Kristen manmeri. Ating yumi lukim pasin bilong telimautim gutnius i olsem wok. Na tu pasin bilong baptais i olsem wok. Olsem na ol i les long prea.

Tasol sapos yumi no save wok strong long prea, ating wanpela kaikai inap kamap long gaden bilong yumi, olsem man i ken bilip long Papa God? Nogat.

Sapos yumi lukim wanpela man i mekim pasin haiden. Olsem na yumi laik kisim em i kam insait long Kingdom bilong God. Bai yumi inap kisim em i kam olsem wanem? Bai yumi inap kisim em long prea tasol.

Long Mak 9:14-29 Jisas i tok i spik, "Prea tasol em inap long rausim dispela kain spirit. Narapela samting i no inap." Ating, sapos yumi bilip tru long pawa bilong prea, bai yumi no ken les moa long prea. Prea em i wok tru bilong Kristen manmeri.

Dispela naispela tingting i kam long wanpela nupela buk ol i kolim WOKABAUT WANTAIM JISAS. Pasto Yanadabing APO i edita, na Kristen Buk Senta, Madang i save salim. I gut yu kisim wanpela.

**OLSEM WANEM KOKOMO  
KISIM BIKPELA TIT?**

Long bipo tru muruk na kokomo i stap olsem gudpela pren tru. Kokomo em i gat liklik tit tasol, na muruk em i gat bikpela tit moa. Orait na wanpela de muruk i wokabaut i go long wanpela gudpela ston na em i lusim tit bilong em na wasim i stap.

Orait na kokomo i tokim muruk, "E pren muruk, ating tit bilong yu i olsem gudpela tamiok. Man, ating mi kisim tit bilong yu na mi go traime katim dispela diwai pastaim".

Orait na kokomo i kisim tit bilong muruk na i go long as bilong wanpela diwai, na em i wok long katim han bilong dispela diwai. Em i tok "Man, poroman, tamiok bilong yu i gudpela tru".


Tasol wanpela bikpela tingting i kirap long kokomo na em i ting. "Ating bai mi trikime muruk na kisim bikpela tit bilong em. Long wa-

nem muruk i gat bikpela tit tru, na em i save yusim ol long kilim ol man tu taim ol i sutim em".

Orait na kokomo i tokim muruk, "E pren muruk, ating tit bilong yu i olsem gudpela tamiok. Man, ating mi kisim tit bilong yu na mi go traime katim dispela diwai pastaim".

Orait na kokomo i kisim tit bilong muruk na i go long as bilong wanpela diwai, na em i wok long katim han bilong dispela diwai. Em i tok "Man, poroman, tamiok bilong yu i gudpela tru".

Na muruk em i wok long lap tasol i stap. Na em i no ting bai kokomo i stilim tamiok



bilong em. Tasol taim kokomo i kamap pinis long tel bilong diwai em i tokim pren bilong em muruk, "E pren, ating mi laik lusim yu nau". Tasol muruk i tok, "Orait yu kisim tamiok bilong mi i kamapastaim". Tasol kokomo i kirap na flai i go antap wantaim tamiok bilong muruk.

Taim muruk i lukim dispela, man, bel bilong em i kirap nogut tru na em i wok long krai tasol. Orait na em i kisim dispela liklik tamiok o tit bilong kokomo na wok long paitim long ston, na bagarapim tit tru, na em i kisim tit na em i go. Tasol muruk i sori tru, long wanem, kokomo i bin kisim gudpela tit bilong em na karim i go pinis.

Na nau yumi ken lukim kokomo em i gat bikpela tit moa. Dispela tit em i bin stilim long muruk. Na muruk em i gat liklik tit tasol.


Nau yumi ting wanem, pasin bilong kokomo i gudpela? Sori, ating em i no gudpela. Long wanem em i olsem stil tasol. Olsem na ating, planti man long Papua Nu Gini ol i save mekim olsem.

Ol i laik trikime arapela man na stil tu.

Kokomo na muruk pastaim tupela i stap olsem gudpela pren tru. Tasol dispela samting i kamap na tupela i stap olsem birua olgeta.

Em i olsem, bipo yumi stap pren tru bilong God. Tasol pasin nogut i bin kamap long yumi, na nau yumi no stap moa pren bilong God. Taim kokomo i kisim tamiok bilong muruk, orait tupela i kamap birua. Olsem tasol taim yumi i mekim sin long ai bilong God, yumi kamap birua bilong God. Na nau yumi stap longwe long God pinis. Tasol sapos yumi bilip tru long Jisas Krai, bai em i tekewe sin bilong yumi na bai yumi kamap pren bilong God. Mantam Yomka

**WOKABAUT WANTAIM JISAS  
BUK 2 NAU EM I REDI**



WOKABAUT WANTAIM JISAS em i wanpela gudpela buk tru na em i bin kamap long hatwok bilong yumi Papua Niugini yet. Pasto Yanadabing Apo em i wok edita long en. Dispela buk em i bilong helpim olgeta Kristen famili long lotu bilong ol long olgeta de.


Na dispela buk em bai i kamap 4-pela hap inap olsem tri mun tri mun. Olsem na nau dispela em i namba tu hap inap yu stat long Epril i go inap long Jun na bai pinis.

Yu ken baim dispela buk long dispela tripela buk stua:

**KRISTEN BUK SENTA**

- ..... P.O. BOX 222 MADANG
- ..... P.O. BOX 215 KUNDIAWA
- ..... P.O. BOX 718 LAE

Oda No. 121...Prais: 30¢



**TOKSAVE LONG OL STORI  
BILONG TUMBUNA.....**

Sapos yu salim wanpela stori bilong tumbuna i kam na mipela i prinim long niuspepa, bai mipela i givim tu dola (\$2) long yu. Sapos yu salim wanpela piksa bilong stori i kam wantaim, bai mipela i givim yu wan dola moa.

# KONSTITUSEN TOKTOK



KONSTITUSENEL PLENING KOMITI LONG Y.C., WEWAK

Konstitusanel Plening Komiti i bin pinisim wok bilongen long Is na Wes Sepik na Madang Distrik. Ol i bin kisim planti gutpela aidia. Em hia sampela:

**SITISEN:** Planti spika i laikim ol gutpela pipel bilong arapela kantri i ken kamap sitisen sapos ol i bin stap longtaim hia na i bin mekim gut long ol pipel. Ol nupela sitisen i mas save tok pisin o tok motu na i mas bihainim ol pasin bilong Papua Nu Gini. Wan wan spika i kros na i tok olgeta waitman na hapkas i mas raus.

**GAVMAN:** Pipel i laik bai distrik gavman i gat moa strong long en na i bosim tru ol wok na ol wokman bilong distrik. Bikpela gavman long Moresby i mas bosim ol bikpela samting tru. Ol i laik tu bai ol pipel yet i ilektim distrik komisina.

**KOT:** Moa na moa pipel i laikim aidia bilong viles kot, o kot long ples yet. Ol i no laik ol jas i no save tru long tok na pasin bilong Papua Nu Gini i kam mekim kot na traime stretim ol rong.

**ILEKSEN:** Pipel i laikim pasin bilong kaunim ol namba wan vot tasol long ol ileksen. Man i kisim planti namba wan vot em i win. Em tasol. Narapela pasin bilong kaunim namba tu na namba tri vot i kostim planti mani na i paulim tingting bilong ol man i laik vot.

**MEMBA BILONG HAUS ASEMBLI:** Planti pipel i kros long ol memba long wanem ol i no save kam lukim ol pipel na toktok wantaim ol na harim wari bilong ol. Sampela i tok ol i no lukim yet memba bilong ol wanpela taim yet.

**PRESIDEN O PRAIM MINISTA?** Sampela pipel i laikim kain gavman yumi gat nau na bai i gat pesman bilong kwin tu i stap. Tasol sampela arapela i no laik na i tok pesman hia em i bilas nating tasol na i no gat strong o wok tru bilong en na i kisim pe nating. Narapela sampela man gen i laikim presiden i bosim kantri na gavman wantaim.

Long sampela ples ol man i no save gut tru yet long selp gavman na independens, tupela i wanem samting tru. Man i no save em i pret long tupela samting hia. Em i as bilong planti wari long ol hailans distrik.

Mipela inap wokim

Autim laik bilong yu tasol

## OLKAIN SAMTING LONG KANDA


olkain sia  
olkain tebol  
olkain basket  
blain pangal

Mipela ken salim long sip o balus. Rait tasol i go long:

**CANE INDUSTRY  
PES-AITAPE, W.S.D.**

Bisnis  
bilong ol  
lokal pipel  
stret

lukim ol  
prais hia




bilong  
strongim  
bun

bilong ol  
liklik  
pikinini



swit moa olsem loli

# OLGETA HARIM GUT!



Dispela sop pauda, ol i kolim "COLD POWER" i nambawan tru. Em i wasim na rausim tru ol kainkain pipia long ol klos bilong yu.

Dispela sop pauda i gat wanpela kain strongpela marasin long en i save mekim save tru long rausim ol kain pipia – long ol klos.

Yu ken usim wara long tang or long wara nating. Dispela i kol wara. Sop "COLD POWER" i strong moa na i ken rausim ol pipia long klos bilong yu.

# ATING YU SAVE.....

## ATING YU SAVE.....

Plak bilong Australia i no moa flai antap long ol sip na ofis na haus bilong gavman. Plak bilong Papua Nu Gini tasol i flai.

Na yumi no moa ken kolim dispela kantri Teritori bilong Papua na Nu Gini. Papua Nu Gini, em tasol i nem bilong en.

## ATING YU SAVE.....

I no longtaim i go pinis, Dipatmen bilong Nius na Toksave i bin statim tripela olkain stori (yu ken painim dispela stori long WANTOK, namba 67 long pes 10). Inap nau ol i bin kisim 167 stori pinis.

## ATING YU SAVE.....

Klostu long Mendi long Sauten Hailans didiman i bin putim sampela nupela kain pis insait long wara Tongo. Sampela yia i go pinis nau na ol man inap go hukim ol. Wanpela man i hukim wanpela pis hevi bilong em inap 10 paun. Sampela arapela man i bin hukim sampela pis moa hevi bilong ol inap 6 paun stret.

Dipatmen bilong didiman i amamas tru long dispela samting na i ting long putim planti pikinini pis moa long ol wara long hailans... long wanem ol i save go bikpela hariap moa.

## ATING YU SAVE.....

Ol pipel i gat kain kain tingting long nem bilong Michael Somare.

I tru, sampela i laik kolim em namba wan minista. Tasol sampela man i laik em i kisim nem bilong bipo olsem waitpus o kukurai.

## ATING YU SAVE.....

Long Simbu sampela ol man i bin pait long mak bilong graun. Ol i tok as bilong trabel em ol pos simen masta mak i bin putim long graun bilong makim ol arere

bilong graun. Ol i laik bai ol dispela pos simen i raus.

Ol i tok ol tumbuna i save wokim gaden long planti hap na i no insait long arere bilong lain bilong ol. Nau ol dispela ston simen i kalabusim ol na ol i no laik.

## ATING YU SAVE.....

Long ples Saidor long hap bilong Madang ol man i gat dispela kain

tok long Konstitusanel Plening Komiti:

Sapos wanpela lokal meri i maritim waitman na i kamap sitisen bilong Australia; em i tambu long kam bek long Papua Nu Gini, tasol ol pikinini bilong en inap long kam bek.

Ol waitman i bin stap longtaim moa long dispela kantri i ken kamap sitisen. sapos ol pipel i save sindaun na wok wantaim ol i laikim olsem.

Tasol sampela arapela

i no laik ol waitman i gat graun o i mekim wok bisnis bai i ken stap.

## ATING YU SAVE.....

Gavman i ting yet long statim wanpela Nesenel Yut Sevis we ol yangpela manmeri i mas givim wan o tu yia long helpim go het bilong kantri long wok bilong ol yet.

Ol bai lainim planti samting na mekim planti gutpela wok. Tasol ol i no ken kisim bikpela pe. Wok bilong ol i olsem presen long kantri.



## Mipela helpim kantri asde tude tumora


Ol balus bilong mipela i save flai moa long 200 taim long wik.

Mipela i gat sampela pailot i bin draivim balus inap 18,000 aua.

Mipela save flai i go long 40 ples balus insait long olgeta hap bilong Papua Nu Gini.

Olsem tasol, mipela i pilim mipela i save moa long flai long Papua Nu Gini.

Na wanem, em i ples tru bilong mipela Ansett.




Serving the country-yesterday, today & tomorrow



**ANSETT AIRLINES OF PAPUA NEW GUINEA**

in conjunction with ANSETT AIRLINES OF AUSTRALIA

AP112



# Korektiv Ofisa

Long Bomana (Port Moresby) 11 nupela korektiv ofisa i bin kisim setifiket long Jun 11 long han bilong namba wan minista Michael Somare. Ol i bin pinisim wanpela kos inap long 6-pela wik.

Em hia nem bilong ol: Napao Namane (Isten Hailans), Noblet Nivo (Noten Distrik), Francis Piyuve (Isten Hailans), Matthias Youfei (W. Sepik), Noblet Wamaingu (Is Sepik), Andrew Kita na Joseph Molnga na Kuntilni Engui (Westen Hailans), Samson Jaro (Morobe) Kurena Serupa na Trevor Remi (Milne Bay).


Dokta John Guise, Mista Les Johnson Plis Komisina Mista Nicholls, na namba tu hetman bilong ol korektiv institusen, Mista Bai i stap long seremoni.

Mista Somare i bin tokim ol nupela ofisa wok bilong ol wantaim ol kalabusman i no isi. Bai ol i no kisim planti tenkyu long ol pipel.

Em i tok, wok bilong ol em i no bilong paitim na mekim save long ol long kalabus. Ol i mas soim ol man i brukim lo long pasin bilong stretim laip na pasin bilong ol na sindaun gut. Olsem tasol ol i ken helpim kantri na ol yet.

Dokta Guise i amamas long lukim olgeta man i stap long mas ol i lokal ofisa tasol. Em i tok amamas long hetman bilong ol korektiv, Mista John Purcell; em i bin mekim wok bilong em gut tumas. Bihain long sampela mun bai em i lusim Papua Nu Gini na olgeta bikpela ofisa long korektiv hetkota i lokal man tasol.

Ol treni i bin kisim setifiket ol i bin skul long ol lo bilong korektiv institut, wok didiman, sampela wok bilong doktaboi, ol lo bilong wokim haus, pasin bilong mas, na sutim raifel, na stapim pait na wok insait long ofis. Long poto. Somare i tilim medal long ol Ofisa.



## YANGPELA MAN, HARIM

Bihainim ol man hia long helpim wok bilong God.

*I gat tupela kain memba:*

- a.) Brata tru
- b.) Asisten Brata

Sapos yu laik save moa long dispela kain laip yu rait i go long :  
**PATER LIEBERT**  
**KATOLIK MISIN**  
**WEWAK**


# Nau yu ken kisim tok i kam long olgeta hap bilong graun

Ating yu laik harim tok i kam long Englan.....  
 o yu laik harim musik i kam long Yurop .....  
 o kisim Sydney o Melbourne o Canberra.....  
 o yu laik kisim olgeta stesin bilong Papua Nu Gini.....

**ORAIT, YU BAIM DISPELA REDIO NA YU WIN.**



**R 358 B**  
 Deluxe Portable (3 Band MW/SW1/SW2)  
 12 Transistor 4 - Diode  
 2 Speakers with big output  
 Easy to read "Magic Meter"



**R 247JB/HB**  
 A/c/Battery operation 2 Band MW/SW  
 8 Transistor in Leatherette Cabinet



**RF 399**  
 Tuned RF Stage, 12 Transistors  
 3 Band (MW/SW1/SW2)  
 Signal strength meter  
 fine tuning.



**BURNS PHILP (New Guinea) LTD**  
 i save salim na fiksिम





# AMAMAS LONG TOK PISIN

## STORI NAMBA WAN

Long'ol 12-pela yia i go pinis planti waitman i tis long ol haiskul na ol praimer skul i bin tok bilas long tok pisin, i bin rabisim em na tok nogut long en.

Planti lokal tisa tumas i bin kisim dispela het tu bikos ol i ting ol i kisim gutpela pe long wanem ol i save tok inglis. Ol i ting dipatmen bilong edukesen i egens long tok pisin; tasol em i no tru.

Nau isi isi moa lokal ofisa i kam insait long dipatmen bilong edukesen na ol i strong long skulim ol sumatin bilong sindaun gut long dispela kantri bilong yumi. Na samting tru bilong dispela kantri em i tok pisin na i no tok inglis. Tok inglis em i tok ples bilong ol Aus-

tralia na ol Englan na ol Amerika. Em tasol.

Ol yet i amamas long tok ples bilong ol, orait yumi mas amamas long tok ples bilong yumi, tu.

### TOK PISIN I WIN

Tok pisin i winim olgeta arapela 700 tok ples bilong Papua Nu Gini. Tok Enga bilong Wabag i gat 180,000 man i tokim. Kuanua bilong Rabaul i gat 80,000 man i tokim. Kuman bilong ol Simbu i gat 80,000 spika. Na tok ples bilong yu yet i gat hamas spika? Ating i no planti.

Na yu save i gat samting olsem 500,000 pipel i save tok pisin. Em i winim olgeta arapela tok ples tru.

Na sapos yumi no tok pisin, bai ol man i go maritim ol meri bilong narapela distrik, bai ol

i tok olsem wanem wantaim meri bilong ol?

### LONG OLGETA HAP

Tok pisin i stap long olgeta ailan, long olgeta nambis bilong Nu Gini. Sapos yu save tok pisin, yu inap tok tu wantaim ol hailans pipel. Na long planti ples long Papua ol lokal pipel i harim tok pisin na ol i no harim tok motu. Olsem tasol i no longtaim na tok pisin bai winim Papua na Nu Gini olgeta.

Long Haus Asembli ol i save tok pisin. I gat moa olsem 3000 lokal gavman kaunsila i save miting long tok pisin tasol.

### LONG OLKAIN WOK

Olgeta dokta, na nes tu olgeta kot, olgeta plisman, olgeta kiap, olgeta redio stesin na lotu long Nu Gini - ol i mas tok pisin.

Olsem sapos man i kirap tok, tok pisin em i samting nating, em i no mekim tok i tru.

Sapos tok pisin i no bikpela samting, bilong wanem Konstitusene Plening Komiti i tok sapos man i laik kamap sitisen bilong Papua Nu Gini, em i mas save tok pisin o tok motu? Sapos tok pisin i samting nating, ol i no ken mekim kain tok olsem.

### SAMTING BILONG TUMBUNA


I gat planti samting i bilong Papua Nu Gini stret na yumi amamas long en. Samting olsem: saksak na taro na bilum na kaukau na brus na buai na suga na garamut na kundu na kanu na tamiook ston na kaving na kumul na pukpuk na golmani - na tok pisin tu. Olgeta samting hia i wanfamili tasol; olgeta ol i bilong kantri bilong yumi stret.

Olsem yumi amamas long olgeta wantaim.


Neks taim bai yumi telimaut olsem wanem tok pisin i kisim nem nogut.

F. Mihalic

OMO i mekim klos i lait tru. Putim OMO long wanpela dis.




Nau paitim wara long han bai spet i kamap. Nau wasim klos




Nau kapsaitim wara antap long Omo. Kolwara i orait tu



I pinis, yu rausim doti wara



Wasim klos gen long klinpela wara nating. Maski sop.



Orait, nau yu lukim: klos i lait tru. Tenkyu long OMO sop



# OLGETA KAIN SAVE I GUTPELA

Olgeta poto i kam long D.I.E.S.





Tripela poto long dispela hap i soim ol manmeri i wok long welpam o tri palmen i save karim pikinini i gat planti wel long ol.

Antap yu lukim sampela meri i karim sampela rop bilong wel pam. Ol i luk olsem bikpela karuka.

Daunbilo yu lukim ol man i skelim ol pikinini bilong wel pam na i laik karim i go long faktori.

Ol dispela wok i kamap long hap bilong Hoskins na Kimbe long Wes bilong Nu Briten. Na hia i gat planti manmeri bilong ol arapela ples i bin kam na i sindaun na statim ol gaden na lain pam tri bilong ol yet. Em nupela samting long Nu Gini.



Long Papua Nu Gini i gat wan wan ples tasol i gat nem bilong wokim sospen graun. Wanpela hia em Yabob long hap bilong Madang. Planti man bilong ol arapela kantri i save kam lukim ol meri Yabob i sindaun wokim ol sospen.


Olsem tasol yumi ken lukim long sampela poto hia. Ol i no gat masin olgeta; ol i mekim ol wok long han nating na long wanpela liklik hap plang tasol.

Antap yumi lukim sampela man bilong Kopiago insait tru long bus bilong Westen Hailans. Ol i brukim plang bilong wokim sampela bris.

Bihain long pait, taim i no gat masin yet i stap, planti man bilong yumi i bin wok long brukim plang olsem tasol na salim long gavman na long ol misin. Dispela longpela so ol i kolim pitso.

Na pik hia, em i namba wan abus long olgeta hap bilong Papua Nu Gini. Long hailans pik em i olsem mani bilong ol pipel, taim ol i go baim meri. Man i gat naispela patpela pik em i laki tru; em i win.





Poto long antap i soim Mista Ignatius Kurei i stap insait long bikpela laibreri long Yunivesiti bilong Papua Nu Gini long Port Moresby. Mista Kurei i kam long Megiar viles long Madang Distrik. Klostu bai em i go mekim 4 mun skul long bikpela Yunivesiti bilong Melbourne long Australia na lainim ol kain kain we bilong lukautim ol buk insait long ofis bilong ol bikpela kampani.



Dispela tupela soldia bilong Queensland long Australia Saiden Bill Kelley wantaim John Hunt, tupela i lainim long wanem ol samting em tupela i bin mekim long wanpela pilai bilong ol soldia long Papua Nu Gini long yia i go pinis.

Long dispela taim tu wanpela lain soldia bilong Adelaide long Australia i kamap long Papua Nu Gini na mekim wanpela pilai bilong hait wantaim wantaim lain soldia bilong Papua Nu Gini. Ol i bin mekim dispela pilai hait long mun Novemba long yia i go pinis.

**'PROLAC'**  
TRADE MARK

**Marasin bilong olkain  
man meri pikinini  
i mas kisim strong.**

**'PROLAC'**  
TRADE MARK



Lens Koprал Beni wantaim meri bilong em Misis Beni tupela i stap insait long Taurama Haus Sik long Port Moresby wantaim nupela pikinini meri bilong tupela nem bilong em Mary. Mary em i namba wan pikinini mama i bin karim long Taurama Haus Sik. Lens Koprал Beni em i save draivim ambulens bilong ami long Taurama Bareks long Port Moresby.

Yu ken lukim em i gat bikpela amamas tru long pikinini bilong em. Taim mama i karim em nupela sista i bin skelim hevi bilong em na em i kamap olsem 6 paun na 4 auns hevi.

## KISIM SAVE SENTA

Planti manmeri bilong Hailans i no save gut long Tok Pisin. Ol i save bihainim tok ples bilong ol tasol. Ol i no save long dispela nambawan toktok bilong Papua Nu Gini. Olsem na ol i wari long kisim tok Pisin olsem wanem.

Ol manmeri bilong Sepik na arapela hap ol i save pinis long bihainim tok Pisin long maus taim ol i liklik yet. Olsem na taim ol i skul long tok Pisin ol i skul long rit rait tasol. Tasol ol Hailans nogat. Long hap bilong Koroba planti i save rit long tok ples na sapos ol i kisim rit long tok Pisin ol inap. Tasol mining tru bilong tok i no kamap klia long ol.

Dispela em i as bilong dispela nupela kain skul i kirap long hap bilong Koroba. Long Lumi long Wes Sepik i gat wanpela Kisim Save Trening Senta. Planti man i bin skul long dispela trening na ol i kamap Kisim Save Tisa pinis long ples bilong ol. Tasol trening long Lumi em i no inap long ol Hailans. Olsem na long Koroba ol i kirapim wanpela Kisim Save Tisa Trening Skul i bungim wok bilong Lumi wantaim pasin bilong lainim maus bilong tok Pisin.

Tupela misinari bilong C.M.M.L., Mista Wali Sim na Miss B. Sundgren i bin mekim hatwok tru long redim sampela kaset na piksa bilong helpim dispela wok i go het. Nau ol i stat long wokim kaset long Kristen Lida Trening Koles long Banz na piksa ol S.I.L. bai i prinim long masin. Bihain tu buk bilong tisa long lainim maus bai i ( Stori i go moa long pes 16 )

# BOOK LOVERS

## MAIL ORDER


NAME \_\_\_\_\_

ADDRESS \_\_\_\_\_

MAIL COUPON FOR FURTHER  
DETAILS TO:


**NEW GUINEA  
BOOK DEPOT**

PO BOX 5495  
BOROKO  
POM



# NISSAN JUNIOR LSD

**STRONGPELA TRAK  
INAP LONG WINIM  
OLKAIN ROT**



**BIKPELA ENSIN -  
91 HOSPAWA  
KEN PULIM NA  
KARIM PLANTI**

**BOROKO MOTORS LTD.**  
THROUGHOUT PAPUA NEW GUINEA





## OL MINISTA GO TOKTOK WANTAIM YUNAITET NESENS

Long namba wan lain na bipo em i namba wan long poto yumi lukim ol bikpela man bilong Australia na Papua Nu Gini i go long Yunaitet Nesens long 30 Me.

Kirap long lephan yu ken lukim: Mista Charles Ashwin i tokman bilong Australia; Mista D. O. Hay em i wok long Dipatmen bilong ol Teritori bilong Australia

na bipo em i namba wan gavman bilong yumi; Mista Julius Chan em i Mista bilong ol Beng na Mista Thomas Kavali em i Minista bilong olkain Wok.

Mista Chan yet i bin givim longpela toktok na ripot long Kaunsil bilong ol Teritori insait long Yunaitet Nesens.

Em i bin tokim ol long go het bilong Papua Nu Gini na long selp gavman i laik kamap long namba wan de bilong Desemba.

Em i autim sampela wari bilong gavman, na olsem wanem yumi mas i gat planti mani liklik yet long mekim go het gut ol skul na wok didiman.

Em i soim ol tu olsem wanem bai long ol yia i laik kam, Papua Nu Gini bai i gat moa na moa ol samting bilong salim long ol arapela kantri. Na em i gutpela samting na i min yumi no mas oltaim singaut long dinau long ol arapela kantri; yumi yet inap long winim mani bilong yumi yet.



# OL TISA TRENI GIVIM GUTPELA HELPIM LONG OL SIK SUMATIN



Em hia ol 15 tisa treni bilong Port Moresby T. Koles i helpim ol sik sumatin i stap long Laloki Haus Sik long Port Moresby. Lain antap: Kirap long lephan i go long raithan yu lukim John Toivita, Lamu Vanua, Levi George, Philip Aume, na Maso Posam. Lain namel: Kirap long lephan i go long raithan yu lukim Yandui Tangura, Sereie Isiah, Gem Gigiba, Matheson Karigawa, Alex Lokopio, na Rupa Pala. Lain daunbilo: Kirap long lephan i go long raithan yu lukim Kaseng Isidore, Alwyn Dudaba, Sumai Sariri, na Peter Oi.

Dispela poto i stap long lephan sait em i soim gutpela eksampel tru long ol man tisa na meri tisa bilong yumi long Papua Nu Gini em ol i tis nabaut nau long olgeta hap.

Dispela ol 15 man i stap long poto long lepsait ol i save mekim bikpela wok tru.

Long olgeta Mande i go inap long olgeta Fraide ol 15 tisa treni hia ol i save go givim sampela lesen na sampela skul wok long ol tarangu sik sumatin i stap long bikpela haus sik long Laloki long Port Moresby. Tarangu ol sumatin hia ol i no inap long go long skul long wanem bikpela sik i bin kisim ol na ol i mas i go na i stap long haus sik tasol na kisim marasin na wetim sapos sik bilong ol i pinis.

Tripela tisa ol i save go long bikpela haus sik bilong Port Moresby na lainim ol sumatin inap wan aua long tripe-la apinun, na arapela tripela tisa ol i save go long Laloki haus sik na lainim ol sumatin inap tu aua long wanpela apinun long olgeta wik. Ol tisa hia ol i save givim bikpela helpim tru i go long ol sik sumatin hia i stap long dispela tupela bikpela haus sik. Em i no wok bilong ol. Nogat. Ol i save helpim ol tarangu sik sumatin tasol. Ol sumatin wantaim ol sampela sik pipel i amamas moa long dispela gutpela skul ol tisa i save givim i go long ol.

I gat foapela arapela meri bilong Yunaitet, Luteran, Englikan, na S.D.A. Misin ol i save helpim ol sik sumatin.



# SANYO



YU KEN HARIM BROTKAS BILONG OLGETA STESIN BILONG PAPUA NEW GUINEA.  
TOK NA MUSIK I KAMAP STRONG NA KLIA MOA MOA.

MOBETA YU GO LUKIM NA HARIM LONG STUA BILONG :


## BRECKWOLDT & CO (NG) PTY LTD



Yu no ken baim narapela redio inap long dispela kain SANYO. Nogat tru.

PORT MORESBY · MADANG · RABAU  
LAE · MT. HAGEN · WEWAK · KIETA

**PAPUA NEW GUINEA 1974**



JANUARY JANUERI	1	2	3	4	5		
	6	7	8	9	10	11	12
	13	14	15	16	17	18	19
	20	21	22	23	24	25	26
	27	28	29	30	31		

**KALA  
KALENDA  
BILONG  
YUMI  
STRET**

Dispela nupela kalenda bilong yia 1974 em bilong yumi Papua New Guinea stret. Wan wan mun i gat naispela kala poto bilong kainkain hap bilong kantri bilong yumi. Yu laik baim sampela ol kalenda? Lukim waitpela oda fom i stap hia, raitim oda bilong yu na salim i kam wantaim sek long mipela:

**WIRUI PRESS, P.O. BOX 107, WEWAK**

**KISIM SAVE SENTA.....**

kamap long stua.

Tupela misinari bilong C.M.M.L., Ossie na Jenny Fountain, wantaim sampela Kristen bilong Ol Sios Bilong Kristen Brata long hap bilong Guala long Koroba, i bin kirapim dispela trening. Narapela man, Yale bilong Pori, i kamap namba tri tisa. Ol i bin kisim 21 studen olgeta na trening i kirap pinis. Dispela trening bai i go tripela wik tripela wik long olgeta tripela mun, i go inap long mun Mas long 1974. Ol dispela manmeri i kam insait ol i bilong Koroba na Kopiago Sap Distrik. Tasol tupela i bilong Baptist Sios. Wanpela bilong Tekin na wanpela bilong Telefo- min.

Dispela i no liklik wok. Em i bikpela na ol dispela tisa na studen i go het long traim dispela nupela kain pasin bilong lainim tok Pisin long maus. Bihain arapela arapela hap bilong yumi i no hatwok tumas long kisim nambawan toktok bilong yumi.

**HAUS KOSTIM LIKLIK**

Komisin bilong bosim wok long ol haus i bin wokim 2,300 haus long Port Moresby, Lae, Madang, Rabaul, Kimbe, Bulolo, Mt. Hagen, Goroka na Alotau insait long 3-pela yia tasol.


Long yia 1968 ol i wokim wanpela nupela haus i kostim \$1000 tasol. Em inap long wokman i mas lusim \$2 tasol long wik long ren. Long ol taun planti wokman i no kisim \$10 long wik; olsem haus hia i samting bilong ol.



OLABOI, MAMA, HET BILONG MI I PEN MOA MOA YET




YU NO MAS WARJ... KISIM ASPRO PASTAIM, BAI PEN I RAUS OLGETA..



TRU TUMAS.. PEN I GO PINIS.. MAMA YU SMAT TUMAS..

EM I NO SAMTING BILONG MI.. EM I ASPRO TASOL..

NAMBAWAN MARASIN BILONG OLGETA PEN.



**PASIN BILONG BAIM WANTOK**

Sapos yu stap long skul o long kaunsil o long wanpela klap, mobeta yupela kisim planti WANTOK i kam olgeta taim. Sapos yupela kisim 10-pela o moa, bai prais i daun tru. Yu rait na askim mipela tasol.

Hia nau yu raitim :

Nem: .....

Adres : .....

Mi laikim ..... pepa i kam olgeta taim

Salim i kam long :

**WANTOK - P.O. BOX 396 - WEWAK**

Sapos yu wanpela yu laik kisim WANTOK i kam long yu stret, orait yu salim dispela tiket i kam:



Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem: .....

Adres: .....

Salim i kam long :

**WANTOK - P.O. BOX 396 - WEWAK**



## SKAI PIKSA

Dispela tupela man i stap long poto antap i makim wanpela lain sa- veman bilong Australia em ol i stap nau long Papua Nu Gini na kisim piksa na wokim mep bi- long dispela kantri. Dispela wok i bin stat long namba 1 de bilong mun Epril long dispela yia na bai i pinis long mun Desemba.

Australia i salim 60 man long mekim dispela wok. Dispela wok bilong kisim piksa long balus na wokim mep bilong dispela kantri, long tok ples bilong mipela o tok Pisin ol i kolim Skai Piksa, (Sky Pic- ture). Dispela ol 60 man bai skelim ol man i go long 8-pela grup o lain na bai ol i salim sampela lain i go long Westen Distrik, na sam- pela lain i go long hap bilong Hailans, na sam- pela lain bai ol i wok long hap bilong Is na Wes Nu Briten Distrik.

Ol i bin mekim sampe- la wok pinis long hap bilong Hailans wantaim Is na Wes Sepik Dis- trik.

Namba wan Minista bi- long yumi Mista Michael Somare i tok Australia i helpim yumi gut tru.

Wantok Publications bi- long Wewak (P.O.Box 396) i wokim, na Wirui Pres long Wewak i prinim.



# KOMATSU

KOMATSU'S D85A Crawler Tractor featuring Cummins NH220 Diesel engine at work on the Daulo Pass, Eastern Highlands

## the power and strength for Papua New Guinea

Parts and after sales service for KOMATSU Crawler Tractors and Track Loaders is provided by TUTT BRYANT PACIFIC LIMITED throughout Papua New Guinea and The British Solomons. Write for further details on how KOMATSU can help you in Papua New Guinea




*Tutt Bryant Pacific Limited*

LAE-MADANG-PORT MORESBY-GOROKA-RABAU-KIETA



# SAVE LONG OL MEMBA



MISTA TOTOMBLE KABAI  
(Dreikikir Open)

AS PLES: Abkumbono, (Is Sepik Distrik)


OL KRISMAS: 40

LOTU: Katolik

SKUL: Em i no go long wanpela skul.

WOK: Tren tupela yia long kamap Etpos Odeli long Boram Haus Sik long Wewak. Wok inap 9-pela yia olgeta long Dreikikir Haus Sik, stap 1 yia kaunsila, na 7 yia presiden long Dreikikir Lokal Gavman Kaunsil. Em i Eksekyutiv Komite memba bilong dispela kaunsil.

FAMILI: Em i marit na i gat 10-pela pikinini.



MISTA SINAKE GIREGIRE  
(Daulo Open)

AS PLES: Asaro (Isten Hailans Distrik)

OL KRISMAS: 35

LOTU: Luteran

SKUL: I no bin go long wanpela skul.

WOK: Presiden bilong Asaro Lokal Gavman Kaunsil. Em i bisnisman na i gat bikpela gaden kopi, gaden kaikai, tretstua, na em i gat liklik bisnis bilong painim gol, na karim pipia long taun. Em i Minista bilong ol Pos Ofis na Telipon long namba tu Haus Asembli.

FAMILI: Em i marit na i gat 2-pela pikinini.



MISTA PARUA KURI  
(Dei Open)

AS PLES: Bul (Westen Hailans Distrik)

OL KRISMAS: 33

LOTU: Luteran

SKUL: Em i no bin long wanpela skul.

WOK: Bipo em i stap hetman long ples bilong em. Em i wanpela bisnisman na i gat 3-pela kain bisnis olgeta. Gaden kopi, banis bulmakau, na wanpela gaden ti. Memba bilong Distrik Advaisari Kaunsil, na Dei Wambol Koprativ Sosaiti.

LUKIM PINIS: I go pinis long Australia.

FAMILI: Em i marit na i gat 6-pela pikinini.



MISTA NUMOI KAUPA  
(Chuave Open)

AS PLES: Arran, (Simbu Distrik)

OL KRISMAS: 26

LOTU: Englikan

SKUL: Em i bin pinisim Fom 2 tasol long Haiskul.

WOK: Bipo em i bin wok long planti ol haus sik nabaut insait long Papua Nu Gini olsem wanpela Medikal Asisten, na pasim sua bilong ol man, meri, na pikinini, na givim marasin i go long ol sik pipel. Em i bin mekim gutpela wok tru raun long Distrik bilong em na ol arapela ples tu.

FAMILI: Em i marit na i gat wanpela pikinini.



## Nupela Haus Kaunsil Gen

Wanpela kampani i save wokim ol haus long Papua Nu Gini ol i kolim (Watkins Overseas Limited), i kisim kontrak pinis long wokim nupela haus kaunsil bilong Mt. Hagen Lokal Gavman Kaunsil insait long Westen Hailans Distrik. Kost bilong dispela kontrak em inap long \$39,000 dola.

Wok bilong dispela nupela haus kaunsil i bin stat long mun Epril long dispela yia na kaunsil i ting olsem bai kampani hia i pinisim olgeta wok bilong dispela haus kaunsil long dispela mun.

Dispela nupela haus kaunsil bai i luk arakain liklik, bikos bai ol i wokim tupela haus wantaim wanpela antap long narapela o skruim wantaim narapela haus. Banis o wol bilong en bai ol i wokim long simen, rup bai ol i wokim long ain, plua bai ol i wokim long timba, na bai ol i wokim planti liklik rum long insait.

Dispela nupela haus kaunsil bilong Mt. Hagen Lokal Gavman Kaunsil bai i kisim ples bilong narapela haus kaunsil bilong ol, em wanpela bikpela paia i bin kukim daun olgeta long mun Oktoba long yia i go pinis.

## Viles Hetman Lukluk Raun

Long mun i go pinis, 5-pela hetman bilong Menyama Sap Distrik insait long Morobe Distrik, ol i bin go lukluk raun insait long Lae Siti.

Taim ol 5-pela hetman hia i stap long Lae, ol i lukim ol wok bilong Lokal Gavman Kaunsil na wanem wok tru ol kaunsila i save mekim insait long Lae.

Long namba 12 i go inap long namba 15 de ol i bin i stap insait long kibung bilong Morobe Distrik Kaunsil Konpres. Ol i amamas tru long go bilong ol.

## Kainantu Ripot

Em hia sampela nius mipela i kisim long namba 4 miting bilong Kainantu Lokal Gavman Kaunsil insait long Isten Hailans Distrik, em ol i bin mekim long namba 12 de bilong mun Epril long dispela yia long Kainantu Haus Kaunsil.

Dispela kaunsil i gat 59 kaunsila olgeta na 52 kaunsila i bin kamap long miting na 7-pela i no bin kamap. Insait long dispela miting 3-pela bikpela man ol i stap na harim wanem ol samting ol kaunsila i bin toktok long en. Em ol hia long Mista D. Butler namba tu kiap bilong Goroka, Mista A. Wadsworth man i bosim olgeta Lokal Gavman Kaunsil long Goroka, na Mista Robbmond man i bosim ol ofis bilong Didiman na olgeta Didiman Stesin long taun bilong Kainantu.

Kaunsil hia bai kisim \$140,000 dola long Komonwel Beng long baim 1-pela kopi plantesin.



Em hia ol sampela kaunsila bilong yumi long Papua Nu Gini i lukluk raun insait long wanpela bikpela stua tru long Australia. Dispela poto ol i bin kisim long taim ol kaunsila bilong yumi i go lukluk raun long ol bikpela bisnis na bikpela faktori long Australia. Ol kaunsila i bin amamas moa long taim ol i lukim ol dispela samting.


Taim ol i kam bek long kantri bilong yumi, ol i bin tokim ol pipel long hap bilong ol olsem, ol i lukim planti bikpela bisnis na bikpela faktori long Australia. Na ol i ting olsem Papua Nu Gini tu inap long kirapim ol bikpela bisnis na ol bikpela faktori olsem long taim bihain.

## Laikim Eria Atoriti Gen

Goroka Lokal Gavman Kaunsil i tok orait pinis long kirapim Eria Atoriti insait long taun bilong Goroka.

Narapela 6-pela Lokal Gavman Kaunsil insait long dispela Distrik tu ol i laik kirapim Eria Atoriti long elektoret bilong ol. Ol kaunsila i toktok long dispela samting insait long wanpela kibung em ol i bin mekim long Goroka Haus Kaunsil i no long-taim i go pinis.

Memba bilong Goroka Open Mista Akepa Miakwe i bin i stap insait tu long dispela kibung. Inap nau i gat 6-pela Eria Atoriti olgeta i wok long Papua Nu Gini.



'READ'

THE LITERACY AND LITERATURE MAGAZINE

- Published Quarterly
- Subscription \$1 yearly

The Editor, Box 43,  
P.O., Ukarumpa, E.H.D.


BOUGAINVILLE KRISTEN BUK SENTA

BOX 66.....KIETA

- \* Nupela Testamen
- \* Baibel Long Tok Inglis
- \* Planti Kain Kristen Buk

*Yu rait na askim long lista bilong ol buk yu ken baim.  
No gat pe long dispela!*

# Nambawan marasin bilong olgeta pen.



## WINIM MAN?

\$5 dola i wet i stap

5 pela man inap winim  
wan dola wan dola.

Mekim tasol wanem samting  
mipela i askim daunbilo hia.

Nau salim i kam long

**WANTOK piksa**  
**Box 396, Wewak**

I gat wanpela pinatang i save katim  
ol liklik lip bilong ol yar tri. Em i  
birua tru bilong ol lip bilong bus.  
Bosman bilong bus i kam painim ol  
pinatang. Em i hait i stap we?

# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.